

Siunnersuummut nassuiaatit

Nassuiaatit nalinginnaasut

1. Aallaqqaasiut

1.1 Siunnersuutigineqarpoq Ineqarneq pillugu Maalaaruteqartarfiup aalajangiisinnaatitaaffii annertusitinneqassasut aammalu inissiat toqqaannartumik imaluunniit toqqaannangitsumik Namminersorlutik Oqartussat kommunillu nalinginnaasumik inissianik pilersuineranni ilaasut aaqqissuunneqarneranni pissusiviusuni allanngortitsinerup malitsigisaanik erseqqissarneqarlutik.

Illuutinut aktiaatileqatigiiffik Illuut A/S, nammineq atini atorlugu namminerlu akilikkaminik inissianik attartortittakkanik, pingaartumik Namminersorlutik Oqartussani sulisunut attartortinneqartartunik, sanaartormermik ingerlataqartoq, Namminersorlutik Oqartussat pilersippaat.

Tasiilami Ittoqqortoormiinilu Namminersorlutik Oqartussat inissiaatai attartortittakkat ulloq 1. januar 2016 aallarnerfigalugu atuutilersumik Kommuneqarfik Sermersuumut tunniunneqarput. Naatsorsuutigineqarpoq ineqarnermut suliassaqarfiup kommuninut tunniunneqarnissaanut ilaatillugu, Namminersorlutik Oqartussat inissiaataannik attartortittakkanik kommuninut tunniussineq siunissami pisassasoq.

Inatsisartut 2022-mut Aningaasanut inatsisaanni, kontumi pingaarnermi 72.10.16 Inissianik attartortittakkanik ingerlatsineq, aningaasaliissutinit iluanaarutit, oqaasertaliusseq naapertorlugu 1. januar 2023 aallarnerfigalugu tunniussinissaq siunertaralugu Namminersorlutik Oqartussat inissiaataannik akeqanngitsumik tunniussinissaq pillugu kommuninut ataasiakkaanut isumaqatiginninniarnissamik isumaqatigiissuteqarnissamillu Naalakkersuisut taamaalillutik piginnaatinneqarput.

Kommuneqarfik Sermersuup kommunip inissianut politikianut ilaatillugu Nuummi, Paamiuni, Tasiilami Ittoqqortoormiinilu kommunip inissiaatai attartortittakkat til Iserit A/S-imut aamma Siorarsiorfimmud – Nuuk City Development A/S, tunniuppai. Tunniussinerit pippud juni 2018 aamma april 2019. Iserit A/S aamma Siorarsiorfik – Nuuk City Development A/S Kommuneqarfik Sermersuumit 100 %-imik pigineqarput.

Taamaaqataanik Kommune Kujalleq (Kujallermi Illuutit A/S, CVR39326442), Kommune Qeqertalik (Kommune Qeqertalik Ejendomsselskab A/S, CVR41079363) aamma Avannaata Kommunian (Avanna Development A/S, CVR40860169) kommunip illuutaannut ingerlatseqatigiiffinnik pilersitsisimappud, ilaatigut inissianik attartortittakkanik piginnittuunissamik ingerlatsinissamillu siunertaqartunik.

Kommuneqarfik Sermersooq Nuummi inissianik amerlanerusunik aammalu inissiat taakkua inissarsiortunut Iserit A/S-imi inissiamut utaqqisut allassimaffianniittunut attartorteqqinnissaat siunertaralugu attartussasoq pillugu inissianik piginnittunut namminersortunut Kommuneqarfik Sermersooq aammattaaq isumaqatigiissuteqarsimavoq. Tamatuma kingorna Iserit A/S Kommuneqarfik Sermersuumut taarsiullugu attartornissamut isumaqatigiissutini arlalinniilersimavoq aammalu ullumikkut inissarsiortunut Iserit A/S-imi inissiamut utaqqisut allassimaffianniittunut inissiat attartorteqqittarnerat isumagisaralugu.

Erseqqissaatigineqassaaq, Inissianik attartortitsisarneq pillugu Inatsisartut peqqussutaanni (attartortitsinermut inatsimmi) allannguutissatullu siunnersuummi matumani attartortup attartortitsisullu akornanni pissutsit kisimik malittarisassiuunneqarmata. Inissarsiortunut attartugassangorlugit pisortat sanaartortitsinerinut, pisinerinut, inissianilluunniit attartortittakkanik attartornerinut inatsisitigut tunngavissat attartornermut inatsisitigut, allannguutissatullu siunnersuutitigut matumuuna malittarisassiuunneqanngillat.

Taamaalilluni inissarsiortumut attartortitsinissaq/attartukkamik attartortitsinissaq siunertaralugu attartornissamik kommuni illuutilimmut isumaqatigiissusiorsinnaanera attartortitsinermut inatsisitigut, allannguutissatullu siunnersuutitigut matumuuna malittarisassiuunneqanngilaq. Tamatuma saniatigut inissarsiortumut attartortitsinermi attartornermi akiliummut annikillisaatitut kommuni tapiissuteqarsinnaanersoq, allannguutissatut siunnersuutitigut matumuuna malittarisassiuunneqanngilaq.

1.2 Inatsisartut 2005-imi inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq (matuma kingorna attartortitsinermut inatsit) akuerimmassuk, inuit najugaqarfissaattut inissianik pisortanit pigineqartunik nalinginnaasumik inissiamik pilersuineq Namminersorlutik Oqartussat kommunillu isumagisaraat. Inuit namminneq (pisinnaatitaallutillu pisussaaffeqartut aamma inuit) nammineerlutik inissiaatiminnik attartortittakkanik inunnut najugaqarfissatut annikinnerusumik attartortitsisarput. Taamaattumik attartortitsinermut inatsimmi piginnittup aamma illuummik attartortittakkamik attartortup akornanni kinaassuseq pillugu tunngaviatigut tunngaviusoq aallaavigineqarpoq.

Ineqarneq pillugu Maalaaruteqartarfiup Namminersorlutik Oqartussat kommunillu inissiaataanni attartortittakkani attartortitsisup aamma attartortup akornanni aaqqiagiinngissutaasut kisiisa suliarisarpai. Ineqarneq pillugu Maalaaruteqartarfiup aalajangiisinnaatitaaffii, attartortitsinermut inatsimmi aalajangersakkanut, Namminersorlutik Oqartussat kommunillu nammineerlutik inissiaataanni attartortittakkanik annertunerpaatigut maleruagassiisunut, atatinneqarput.

Ineqarneq pillugu Maalaaruteqartarfiup paasinninnera malillugu, Ineqarneq pillugu Maalaaruteqartarfimmut maalaaruteqarnerup nalaani inissiaq attartortittagaq Namminersorlutik Oqartussanit imaluunniit kommuninit pigineqarluni, inissiat attartortittakkat pillugit attartortup attartortitsisullu akornanni aaqqiagiinngissutaasut, kisiisa suliarisinnaavai.

Inissiat attartortittakkat Namminersorlutik Oqartussat kommunillu nalinginnaasumik inissianik pilersuineranni ilaatinneqartut aaqqissuussaaneranni allanngortitsinermi, attartukkat arlallit siunertaanngitsumik Ineqarneq pillugu Maalaaruteqartarfiup aalajangiisnaatitaaffiini ilaatinneqanngillat. Tassani pingaartumik kommunit inissiaataat attartortittakkat Kommuneqarfik Sermersuumiit Iserit A/S-imut aamma Siorarsiorfimmud – Nuuk City Development A/S – tunniunneqartuni attartortut pineqartunut ilaapput.

Ineqarneq pillugu Maalaaruteqartarfik attartortitsinermut inatsit naapertorlugu maalaaruteqartarfittut nammineertutut aamma arlaannaannulluunniit attuumassuteqanngitsut pilersinneqarpoq. Suliassat pissusiviusuni suliarineqassanersut imaluunniit itigartinneqassanersut, Ineqarneq pillugu Maalaaruteqartarfik nammineerluni aalajangiisarpoq. Naalakkersuisut maalaarutip pissusiviusuni suliarineqarnissaanut itigartitsinissaq imaluunniit suliarinninnissaq imaluunniit maalaarutini aalajangersimasunik aalajangiisnissaq pillugu nalinginnaasumik imaluunniit aalajangersimasunik ilitersuutini Ineqarneq pillugu Maalaaruteqartarfimmud nalunaarutiginnissinnaanngillat.

Taamaattumik inissiat attartortittakkat, Namminersorlutik Oqartussat kommunillu nalinginnaasumik inissianik pilersuineranni ilaatinneqartut, aaqqissuussaanerannik allanngortitsinermut, Ineqarneq pillugu Maalaaruteqartarfiup aalajangiisnaatitaaffiini naleqqusaanissamut, attartortitsinermut inatsisip allanngortinneqarnissaa pisariaqarpoq.

2. Siunnersuummi immikkoortut pingaernerit

Siunnersuutigineqarpoq Ineqarneq pillugu Maalaaruteqartarfiup pisortatigoortumik aalajangiisnaatitaaffii allanngortinneqassasut erseqqissarneqassasullu, taamaalilluni maalaaruteqartarfiup Namminersorlutik Oqartussat, kommunit imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik attartortitsisuullutik, attartortitsisup inissiamik attartortittakkamik piginnittuunera apeqqutaatinnagu, inissiat attartortittakkat pillugit attartortup attartortitsisullu akornanni aaqqiagiinngissutaasut suliarisinnaalissallugit.

Aalajangiisutut sunniuteqarneq ingerlatseqatigiiffinnut inatsimmi qaqugukkulluunniit atuuttumi malittarisassiuunneqassaaq. Aktie aamma anpartsselskabit pillugit inatsisip Kalaallit Nunaanni atulersinnera pillugu peqqussutsip nr. 486, 14. maj 2018-imeersumi (Ingerlatseqatigiiffinnut inatsit) § 7-ia naapertorlugu, Namminersorlutik Oqartussat kommuniluunniit ima aalajangiisutut sunniuteqarpoq:

§ 7. Aalajangiisutut sunniuteqarneq tassaavoq suliffeqarfiutigisap aningaasaqarnikkut ingerlatsinikkullu aalajangiisneranik aqutsinissamut pinnaatitaasoq.

Imm. 2. Suliffeqarfiutigisamut naleqqiullugu aalajangiisutut sunniuteqarneq pigineqalersarpoq suliffeqarfiutigisap aqqutigalugu toqqaannartumik toqqaannanngitsumilluunniit ingerlatseqatigiiffik piginnittoq suliffeqarfimmi taasisinnaatitaasut affai sinnerlugit pigisaqarpat, immikkut pisuni uppersarneqarsinnaappat taamatut piginnittuunerit pissutsit aalajangiisutut sunniuteqanngitsut.

Imm. 3 Suliffeqarfimmi ataatsimi taasisinnaatitaanerit pinnaatitaaffiit affai sinnerlugit ingerlatseqatigiiffik

piginnittoq piginninngippat, ingerlatseqatigiiffik piginnittoq aalajangiisutut sunniuteqassaaq

- 1) aningaasaliisunik allanik isumaqatigiissuteqarnermigut taasisinnaatitaanermi pisussaaffiit affai sinnerlugit naalagaappat,
- 2) malittarisassat imaluunniit isumaqatigiissut naapertorlugu suliffeqarfimmi aningaasanut ingerlatsinermullu pissutsinik aqutsinissamut pisinnaatitaappat,
- 3) aqutsinermi aaqqissuussinermi qullersani ilaasortat amerlanersaanik toqqaanissamut imaluunniit sor-aarsitsinissamut pisinnaatitaappat taamatullu aaqqissugaaneq suliffeqarfimmi aalajangiisutut sunniuteqarpat imaluunniit
- 4) ataatsimeersuarnermi imaluunniit aaqqissugaanermi taamaaqataani taasisinnaatitaasut amerlanersaanut piviusumik naalagaaguni taamaalillunilu suliffeqarfik pillugu piviusumik aalajangiisutut sunniuteqarluni.

Imm. 4. Taasisinnaatitaasut piuneri sunniuteqarnerilu, tassunga ilanngullugu aningaasaatitigut pigisanik pisinnaatitaaneq aamma pisinissamut periarfissaqarnerit, piviusumik iluaqutigineqarsinnaasut imaluunniit allanngortinneqarsinnaasut, ingerlatseqatigiiffiup aalajangiisutut sunniuteqarneranik nalliiinermi isigineqassaput.

Imm. 5. Suliffeqarfiutigisami taasisinnaatitaasunik naatsorsuinermi suliffeqarfiutigisap nammeneq imaluunniit taassuma suliffeqarfiutigisaata pigisaanut aningaasaatinut pigisanut atasut taasisinnaatitaanerit ilaatinneqassanngillat.

Siunnersuutigineqarpoq Ineqarneq pillugu Maalaaruteqartarfik attartortup attartortitsisullu akornanni aaqqiagiinngissutaasunik, attartortitsinissamut isumaqatigiissutinit makkunaneersunik, suliarinninnissamut aalajangiisinnaatitaassasoq:

1) Inissianik attartortittakkanik Namminersorlutik Oqartussanit imaluunniit kommunimit pigineqartunik attartortumut najugaqarfissatut attartortitsineq pillugu isumaqatigiissut.

Aalajangersakkami Ineqarneq pillugu Maalaaruteqartarfiup maannakkut pisortatigoortumik aalajangiisinnaatitaaffii pineqartunut ilaatinneqarput.

2) Attartornissamut isumaqatigiissuteqareernerup kingorna inissiaq attartortittagaq allamut tunniunneqarsimappat, inissianik attartortittakkanik isumaqatigiissuteqarnerup nalaani Namminersorlutik Oqartussanit imaluunniit kommunimit pigineqartunik attartortumut najugaqarfissatut attartortitsinissaq pillugu isumaqatigiissut.

Aalajangersakkami pineqartunut ilaatinneqarput attartornissamut isumaqatigiissutit pisortanit piginnittuusunit attartortitsisuusunillu isumaqatigiissutigineqaqqaarsimasut aammalu inissiaq attartortittagaq attartornissamut isumaqatigiissut pioreersoq ilanngullugu allamut, ilanngullugit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik, tunniunneqarsimasoq.

3) Inissianik attartortittakkanik Namminersorlutik Oqartussanit imaluunniit kommunimit attartorneqartunik, tamatumalu kingorna attartortumut attartorteqqinneqartunik, attartortumut najugaqarfissatut attartortitsinissaq pillugu isumaqatigiissut.

Aalajangersakkami pineqartunut ilaatinneqarput attartornissamut isumaqatigiissutit, pisortat inissiamik attartortittakkamik piginnittuunngikkaluartut, pisortanit attartortutut isumaqatigiissutigineqarsimasut (allamut attartortitseqqinneq).

4) Inissianik attartortittakkanik Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit attartorneqartunik, tamatumalu kingorna attartortumut attartorteqqinneqartunik, attartortumut najugaqarfissatut attartortitsinissamut isumaqatigiissut.

Aalajangersakkami pineqartunut ilaatinneqarput attartornissamut isumaqatigiissutit, inissiaatileqatigiiffik inissiamik attartortittakkamik piginnittuunngikkaluartoq, Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik attartortutut isumaqatigiissutigineqarsimasut (allamut attartortitseqqinneq). Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik Namminersorlutik Oqartussanut imaluunniit kommunimut sanillunneqarpoq, takuuk matuma siuliani imm. 3.

5) Inissianik attartortittakkanik, Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit pigineqartumit attartortumut najugaqarfissatut attartortitsinissamut isumaqatigiissut.

Aalajangersakkami pineqartunut ilaatinneqarput attartornissamut isumaqatigiissutit, Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmut, inissiaatileqatigiiffiup nammineq inissiaataannik attartortittakkanik attartortitsisunut, isumaqatigiissutigineqartut.

Kiisalu siunnersuutigineqarpoq, attartorneq pillugu attartortitsisup suliamik naammassinninneranit kingusinnerpaamik sapaatip akunneri sisamat qaangiunnerini, Ineqarneq pillugu Maalaaruteqartarfimmut maalaaruteqarsinnaanermut nalinginnaasumik piffissaliisoqasasoq.

3. Pisortanut aningaasaqarnikkut allaffissornikkullu sunniutaasussat

3.1 Siunnersuutip atuunnerani pisortat inissiaatai attartortittakkat Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmut tunniunneqarnissaasa tungaanut, Ineqarneq pillugu Maalaaruteqartarfiup aalajangiisinnaatitaaffiini pineqartunut ilaatinneqarsimasut, pineqartunut ilaatinneqaqqilissapput.

Ineqarneq pillugu Maalaaruteqartarfiup akiliut Inatsisartut Aningaasaqarnermut inatsisaanni aalajangersagaasoq, inissiat attartortittakkat pineqartut piffissami tassani Ineqarneq pillugu Maalaaruteqartarfiup aalajangiisinnaatitaaffiini pineqartunut ilaatinneqarsimanninnerisa malitsigisaanik, allanngortinneqarsimannigilaq.

Aalajangersakkap aammattaaq atuunnerani Ineqarneq pillugu Maalaaruteqartarfiup pisortatigoortumik aalajangiisinnaatitaaffii, aamma inissiat attartortittakkat Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit

sananeqarlutillu pigineqartut pineqartunut ilaailerlugit, annertusitinneqarput. Taakkunani maannakkorpiaq ilaatinneqarput inissiat attartortittakkat Illuutinu aktiaatileqatigiiffimmit Illuut A/S-imit aamma Iserit A/S-imit sananeqartut. Missiliorneqarpoq maannakkorpiaq inissiat attartortittakkat Illuutinu aktiaatileqatigiiffimmit Illuut A/S-imit sananeqarlutillu pigineqartut 747-t missai aammalu inissiat attartortittakkat Iserit A/S-imit sananeqarlutillu pigineqartut 48-t missai, pineqartunut ilaatinneqartut. Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik nutaanik inissianik attartortittakkanik sanaartornerisa ilutigisaanik inissiat attartortittakkat Ineqarneq pillugu Maalaaruteqartarfimmut maalaarutigineqarsinnaasut amerlisussaapput.

Kiisalu siunnersuutip atuutilernerani Ineqarneq pillugu Maalaaruteqartarfiup pisortatigoortumik aalajangiisinnaatitaaffii aamma inissiat attartortittakkat Namminersorlutik Oqartussanit, kommunimit imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit, inissianik attartortittakkanik piginnittunit namminersortunit attartorneqartut, tamatumalu kingorna inissarsiortunut attartorteqqinneqartut, pineqartunut ilaailerlugit annertusitinneqarput. Missiliorneqarpoq tamatuma inissiat attartortittakkat Ineqarneq pillugu Maalaaruteqartarfimmut maalaarutigineqarsinnaasut inissianik 400-it missaannik amerlanerulersissagai.

Inissarsiortunut Iserit A/S-imi inissiamik utaqqisut allattorsimaffianniittunut attartortitseqqinnissaq siunertaralugu, Kommuneqarfik Sermersuup aamma Iserit A/S-ip inissianik attartortittakkanik piginnittuni namminersortuni inissiat attartortittakkat attartugaat 2020-mi oktobarimi 400-t missaannik amerlassuseqarput.

Namminersorlutik Oqartussat Illuutinu aktiaatileqatigiiffik Illuut A/S-imi inissianik attartorput kiisalu inissianik attartortittakkanik atugassiinissaq pillugu Illuut A/S-imut isumaqatigiissuteqarlutik. Inissiani kingulliullugu taaneqartuni Illuut A/S-ip aammalu attartortup akornanni toqqaannartumik attartornissamut isumaqatigiissuteqartoqartarpoq. Inissiat attartortittakkat taakkua inissiani attartortittakkani 747-t missaanniittuni ilaapput aammalu inissiat attartortittakkat Illuutinu aktiaatileqatigiiffik Illuut A/S-imit sananeqarlutillu pigineqarlutik, takukkit matuma siulianiittut. Namminersorlutik Oqartussat inissianik attartortittakkanik attartornerat allanullu attartortitseqqinnerat aningaasanut inatsimmi oqaasertaliussami maleruagassiivigineqarpoq, takuuk AI 2022, kontu pingaarneq 72.10.16 Inissianik attartortittakkanik ingerlatsineq, aningaasaatinit iluanaarutit.

3.2 Ineqarneq pillugu Maalaaruteqartarfiup 2017-imi maalaarutit 62-it tigusimavai. Suliassat katillugit 32-it naammassineqarsimapput, taakkunanga marluk maalaaruteqartarfimmi ataatsimiinnermi suliarineqarlutik. 30-t sinneri akiliutip akilerneqannginnera, aalajangiisinnaatitaannginneq, inatsisitigut soqutigisaqartuunnginneq pissutigalugit imaluunniit maalaarutip tunuartinneqarnera pissutigalugu imaluunniit suliap siunertaqannginnera pissutigalugu, itigartinneqarlutik.

Ineqarneq pillugu Maalaaruteqartarfiup 2018-imi maalaarutit 78-it tigusimavai. 2018-imi suliassat 38-t akiliutip akilerneqannginnera, aalajangiisinnaatitaannginneq, inatsisitigut

soqutigisaqartuunnginneq pissutigalugit imaluunniit maalaarutip tunuartinneqarnera pissutigalugu imaluunniit suliap siunertaqannginnera pissutigalugu, itigartinneqartut naammassineqarput.

Ineqarneq pillugu Maalaaruteqartarfiup 2019-imi maalaarutit 52-it tigusimavai. 2019-imi suliassat 71-it akiliutip akilerneqannginnera, aalajangiisinnaatitaannginneq, inatsisitigut soqutigisaqartuunnginneq pissutigalugit imaluunniit maalaarutip tunuartinneqarnera pissutigalugu imaluunniit suliap siunertaqannginnera pissutigalugu, itigartinneqartut naammassineqarput.

Ineqarneq pillugu Maalaaruteqartarfiup 2020-mi maalaarutit 67-it tigusimavai. 2020-mi maalaarutit 35-it akiliutip akilerneqannginnera, aalajangiisinnaatitaannginneq, inatsisitigut soqutigisaqartuunnginneq pissutigalugit imaluunniit maalaarutip tunuartinneqarnera pissutigalugu imaluunniit suliap siunertaqannginnera pissutigalugu, itigartinneqartut naammassineqarput.

Maalaarutit annertussusaannut nassuiarneqartunut inissiat attartortittakkat Namminersorlutik Oqartussanit pigineqartut 6.680-t missai aammalu inissiat attartortittakkat kommuninit pigineqartut 4.894-it missai aallaavigineqarput. Katillugit 11.574-it missai. Tamanna inissiat attartortittakkat tamarmiusut 1 %-iat sinnernagu ukiumut maalaarutitut naapertuuppoq.

Naliliisoqarpoq Ineqarneq pillugu Maalaaruteqartarfiup pisortatigoortumik aalajangiisinnaatitaaffiisa inissianik attartortittakkanik Ineqarneq pillugu Maalaaruteqartarfiup maalaarutigineqarsinnaasunik 1.123-t missaannik amerlassusilinnik pissusiviusuni annertusitinneqarnera, ukiumut maalaarutit nutaat 10-t missaanniilernerannik (inissiat attartortittakkat 1.123-t 0,9 %-iisa missai) pissutissaqalersitsissasoq ilimanarpoq. Taamaattoq siunnersuutip atuutilernerani piffissami ikaarsaarfiusumi maalaarutit amerlanerunerat nalaanneqassasoq mattunneqarsinnaanngilaq.

Naliliisoqarpoq taamatut suliassanut aallaaviusussat Inatsisartut Aningaasanut inatsisaanni Ineqarneq pillugu Maalaaruteqartarfiup aningaasaliissutit atuutereersut iluanni isumagineqarsinnaassaaq. Taamaattoqanngippat Ineqarneq pillugu Maalaaruteqartarfik aningaasaliissutit atuutereersut qaffannissaannik qinnuteqarsinnaavoq, tassa imaappoq akiliutip attartortitsisup akiligassaata qaffanneqarnissaa qinnutigalugu.

3.3 Attartortitsinermut inatsimmi § 83, imm. 5 naapertorlugu inissianik attartortittakkanik Ineqarneq pillugu Maalaaruteqartarfiup pisortatigoortumik aalajangiisinnaatitaaffiini pineqartunut ilaasunik attartortitsisuni akiliummik akiliisitsisoqarsinnaavoq. Ineqarneq pillugu Maalaaruteqartarfiup aalajangiisinnaatitaaffiisa annertusitinneqarneranni Inatsisartut Aningaasanut inatsisaanni maleruagassiinnikkut inissiat attartortittakkat akiliuteqarfiusussat peqatigisaanik amerlissineqarsinnaapput.

Attartortitsinermut inatsimmi § 83, imm. 5 naapertorlugu maannakkorpiaq Ineqarneq pillugu Maalaaruteqartarfiup akiliut, pisortat inissiaataannik attartortittakkanik attartortitsisartuni

attartukkamut ataatsimut 66 koruuniusoq, akilersinneqartarpoq. Akiliut Inatsisartut 2022-mut Aningaasanut inatsisaanni, kontumut pingaarnermut 62.30.01 Atuisartunut Unammilleqatigiinnermullu Aqutsisoqarfik, allaffissorneq, oqaasertaliussami aalajangersagaavoq.

4. Inuussutissarsiortunut il.il. aningaasaqarnikkut allaffissornikkullu sunniutaasussat

Naliliisoqarpoq siunnersuut inuussutissarsiortunut il.il. aningaasaqarnikkut allaffissornikkullu sunniuteqassanngitsoq. Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik, naammagittaalliuutip suliarineqarneranut ilaatillugu Ineqarneq pillugu Maalaaruteqartarfimmut killilimmik allaffissornikkut akissuteqartarnissamik pisussaaffilerneqarput.

5. Avatangiisinut pinngortitamut peqqissutsimullu sunniutaasussat

Siunnersuut avatangiisinut pinngortitamulluunniit sunniuteqassanngitsoq naliliisoqarpoq. Taamatuttaaq peqqissutsimut sunniuteqassanngitsutut nalilerneqarluni.

6. Innuttaasunut allaffissornikkut sunniutaasussat

Siunnersuummi Ineqarneq pillugu Maalaaruteqartarfiup attartortuniit maalaarutinik suliarinninnissaanut pisortatigoortumik aalajangiisinnaatitaaffiit annertusitinneqarput. Naliliisoqarpoq siunnersuut allatigut innuttaasunut allaffissornikkut sunniuteqassanngitsoq.

7. Allat pingaarutillit sunniutaasussat

Siunnersuut Naalagaaffeqatigiinnermut imaluunniit Kalaallit Nunaata inatsisini tunngaviusuni inatsisitigut inissisimaneranut tunngasunut sunniuteqassanngilaq.

8. Oqartussanut kattuffinnullu tusarniaaneq

Tusarniaanermut allakkiaq, ilanngussaq 2, innersuussutigineqarpoq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut.

Imm. 1-imut

Aalajangersagaq siunnersuummi nr. 6-imut (§ 82a) ataqatigiissillugu isigineqassaaq.

Pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik allani inissianik attartortittakkanik attartorlutik, tamatumalu kingorna taakkua inissarsiortunut attartorteqqinneranni attartortitsinnermut isumaqatigiissutit arlallit Ineqarneq pillugu Maalaaruteqartarfiup aalajangiisinnaatitaaffiini pineqartunut ilaatinneqalissasut, § 82a-mi siunnersuutigineqarpoq.

Inissiani attartortittakkani Namminersorlutik Oqartussanit kommuniniillu pigineqartuni attartortut pisinnaatitaaffii aamma pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik allani inissianik attartortittakkanik attartorlutik, tamatumalu kingorna taakkua inissarsiortunut attartortinnerini/attartorteqqinnerini attartortitsinnermut isumaqatigiissutininut aamma atuutilissasut siunnersuutigineqarpoq. Ineqarneq pillugu Maalaaruteqartarfiup tamatuma kingorna attartukkat taamaattut pillugit maalaarutit maleruagassat inissianut attartortittakkanut Namminersorlutik Oqartussanit kommuniniillu pigineqartunut atuuttut malillugit suliarisinnaalissavai.

Pisortaq, imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik, illuutip piginnittuanut tunngatillugu illuutit/inissiat attartortittakkat ataasiakkaat taamanikkussamut isumaqatigiissutini qanoq issusaat atuutsillugu utertinnissaannut akisussaasuussapput. Kisianni pisortat, imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik, aammalu illutip piginnittuata akornanni isumaqatigiissuteqarnermut tunngasut attartorteqqitamik attartortup pisortanut imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmut pisinnaatitaaffiinut pisussaaffiinullu pingaaruteqanngillat.

Immikkut attartukkat siunnersuummi § 1a, imm. 1-imi pineqartunut ilaasut siusinnerusukkut attartortitsisarnermut inatsimmi pineqartunut ilaasimangillat. Attartortitsisarnermut inatsit pisortat aamma namminersortut nammineq pigalugit inissiaataannik attartortitsisarnermik maleruagassiinissamut ilusilersugaavoq. Taamaattumik attartortitsisarnermut inatsimmi maannakkut maleruagassat, immikkut attartukkanut siunnersuummi § 1a, imm. 1-imi pineqartunut ilaasunut pisariaqartumik naleqqussarlugit atorneqartariaqarlutik, pisoqalersinnaavoq. Attartortoq aammalu attartortitsisisoq immikkut attartukkat siunnersuummi § 1a, imm. 1-imi pineqartunut ilaasut naapertorlugit, inissianik attartortittakkanik Namminersorlutik Oqartussanit kommuninillu pigineqartunik

attartortitsisarneq pillugu isumaqatigiissutituulli, atugassaqartinneqarnissaat sapinngisamik annertunerpaamik attartortitsisup ilungersuutigissavaa.

Kapitali 3-mit 7-imut kiisalu kapitali 9-mit 11-mut aalajangersakkanik sanioqqutitsillutik naleqqussaanerit tunngavilersorluagaasariaqarput, naleqqussaanerillu attartornermut isumaqatigiissummi ilaatinneqassallutik.

Suliaqarnermi pisunik nassuiaanikkut aammalu allaffissornikkut suleriaatsikkut iluarsiivigineqarsinnaangitsunik pisoqalerpat, Naalakkersuisut i siunnersuummi §1 a, imm. 3 malillugu Naalakkersuisut tamatumunnga maleruagassanik aalajangersaanissamut piginnaatinneqarput.

Inissianik attartortittakkanik najorneqanngitsunik innersuussineq pillugu attartortitsinermit inatsisip kapitali 2-ani aalajangersakkat aalajangersakkami ilaatinneqanngillat. Attartortitsisup malittarisassiai tunngavigalugit, immikkut attartukkanik taakkuninnga innersuussisoqartarpoq. Taamaalilluni inissianik taakkuninnga pineqartunik pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik piginnittuunnginnissaa pingaartinneqarpoq.

Attartortitsinermit inatsimmi attartortup atuisinnaatitaanera pillugu kapitali 8-imi aalajangersakkat aalajangersakkami ilaatinneqanngillat. Taamaaliornermi pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik, inissianik taakkuninnga piginnittuunnginnerat, pingaartinneqarpoq. Taamaattumik attartortut attartukkami atortulersuutinik ikkussuinissamut, allanngortiterinissamut imaluunniit pitsanngorsaansamut inatsisitigut piunasaqaateqarsinnaatinneqanngillat.

Taamaattoq pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik attartortup qinnuteqarneratigut attartukkami aalajangersimasunik atortulersuutinik ikkussuinissamut, allanngortiterinissamut imaluunniit pitsanngorsaansamut akuersissuteqarsinnaassapput, tamatumunngalu atugassarititaasunik erseqqinnerusunik aalajangersaasannaassallutik. Pisortat aamma inissiaatileqatigiiffiit pisortanit 100 %-imik pigineqartut inissianut attartortittakkanut ataasiakkaanut nammineq suleriaasissaminnik aalajangersaassapput. Suleriaatsimut ilaatigut inissianik attartortittakkanik ataasiakkaanik piginnittunut attartornissamut isumaqatigiissutini atugassarititaasut tunngavigineqassapput.

Imm. 2-mut

Pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik inissianik attartortittakkanik attartortut, taakkuninngalu imm. 1 malillugu inissarsiortunut attartortitseqqittut, inissiani attartortittakkani Namminersorlutik Oqartussanit kommuninillu pigineqartuni attartornermut

akiliummik aalajangersaasarnermut maleruagassat malillugit inissiani attartortittakkani attartorteqqinneqartuni attartornermut akiliut aalajangersartussaassavaat.

Erseqqissarneqarpoq inissiat attartortittakkat, pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiatileqatigiiffik, inissianik attartortittakkanik attartorfigisimasaat aammalu taakkua inissarsiortunut attartorteqqissimasaat, naatsorsuuserinikkut immikkoortortami nammineertumi najugaqarfimmi ataatsimi ataatsimoortissinnaagaat.

Imm. 3-mut

Inissiat attartortittakkat, pisortanit imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiatileqatigiiffimmit attartorneqartut, tamatumalu kingorna inissarsiortunut attartorteqqinneqartut suliap pissusissamisoornerani pisortanit imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiatileqatigiiffimmit pigineqangillat. Attartukkat taamaattut siusinnerusukkat attartortitsisarnermut inatsimmi pineqartunut ilaasimangillat.

Naalackersuisut maleruagassanik aalajangersaanerat ajornartorsiutit immikkut ittut, attartortitsisarnermut inatsisip ataani siunnersuummi § 1 a, imm. 1-imi immikkut allanut attartortitseqqinnissamik isumaqatigiissutit ilanngutsinneqarneranni pilersinnaasut, iluarsiniarlugit taamaallaat tamanna pisinnaavoq. Immikkut allanut attartortitseqqinnermut isumaqatigiissutit naapertorlugit attartortup attartortitsisullu, inissianik attartortittakkanik Namminersorlutik Oqartussanit kommuninillu pigineqartunik attartortitsinissaq pillugu isumaqatigiissutituulli, atugassaqartinneqarnissaat Naalackersuisut sapinngisamik annertunerpaamik anguniassavaat.

Inissianik attartortittakkanik piginnittunut attartornissamut isumaqatigiissutit inissiat iluini silataannilu aserfallatsaaliuineq, illuartitat, aningaasaatinut iluanaarutit il.il. pillugit apeqqutinik aalajangersaaviupput. Maleruagassiineq tunngaviusut attartornermut inatsimmi tunngaviusut malillugit aalajangersaanermi atorneqarsinnaanngissinnaasut malillugit pisinnaavoq. Taamaattumik pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiatileqatigiiffik inissianik attartortittakkanik attartorlutik, taakkuninngalu inissarsiortunut attartortitseqqillutik pisuni, attartortitsinermut inatsimmi kapitali 3-5-imi, 7-imi aamma 9-11-imi maleruagassat allanngortinneqarnissaat imaluunniit ilassuserneqarnissaat pisariaqartinneqartoq paasinarsisinnaavoq.

Inissianik attartortittakkanik piginnittunut attartornissamut isumaqatigiissutit atugassarititaasut piffissamut killigaasut tunngavigalugit imaluunniit atorunnaarsitsinissamik ilimasaarinissaq isumaqatigiissutigineqarluni, isumaqatigiissutigineqarsimasarnerat nalinginnaasuusaaq. Tunngavissaatinneqarpoq pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiatileqatigiiffiup, inissianik attartortittakkanik allanut attartortitseqqinneranni tamanna pisariaqartutut annertussusilimmik sillimaffigineqassasoq. Taamaattoq inissiap attartortittakkap

piginnittuanut utertissinnaanissaanut tamanna pitillugu, pisortat imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik allamut attartortitseqqinnermut isumaqatigiissutip atorunnaarsinnissaanut periarfissiinissaq pisariaqalersinnaavoq.

Nr. 2-mut.

Ineqarneq pillugu Maalaaruteqartarfik paasissutissiivoq maalaaruteqartarfik inissiani attartortittakkani Kommuneqarfik Sermersuup attartortumut attartornissamut isumaqatigiissuteqarfigisimasaanni, tamatumalu kingorna Iserit A/S-imut imaluunniit Siorarsiorfimmum – Nuuk City Development A/S – inissiaq attartortittagaq tunniussimasaanni najugaqartuni attartortunit maalaarutinik tigusaqarsimasoq. Ineqarneq pillugu Maalaaruteqartarfik naliliivoq maalaaruteqartarfik maalaarutit taakkua suliarinissaannut aalajangiisinnaatitaanngitsoq, taamaattumillu maalaarutit itigartissimallugit.

Naliliisoqarpoq attartortitsisoq inissiat attartortittakkat allamut tunniunneranni attartortunut attartornermut isumaqatigiissut aamma attartortitsinerumut inatsit naapertorlugit pisinnaatitaaffeerutsitsisinnaanngitsoq. Naliliisoqarpoq inissiap attartortittakkap tunniunneqarnerani tiguisoq attartornissamut isumaqatigiissut aamma attartortitsinerumut inatsit malillugu pisinnaatitaaffinni pisussaaffinnilu piusuni tamaginni pisussaalertartoq.

Taamaattumik siunnersuutigineqarpoq, inissiat attartortittakkat tunniunneqarneranni tiguisoq attartornissamut isumaqatigiissut aamma attartortitsinerumut inatsit malillugu pisinnaatitaaffinni pisussaaffinnilu piusuni tamaginni pisussaalertartoq imm. 4-mi erseqqissarneqassasoq. Tiguisup attartornissamut isumaqatigiissut atugassarititaasut siusinnerusukkat attartortitsisup aammalu attartortut ataasiakkaat akornanni attartornermut tunngassuteqartuni atuuttut, tiguisimavai.

Nr. 3-mut

Attartortut akerliliissuteqarsinnaanerinit piffissaliussaq sapaatip akunnerinit marluusunit sisamaasunut sivitsorneqassasoq siunnersuutigineqarpoq. Attartornermi akigititanik qaffaanissaq pillugu siumut ilimasaaruteqarnerit eqqarsaatigalugit Ineqarneq pillugu Maalaaruteqartarfimmum maalaaruteqarsinnaanermum, attartortitsisunullu privatinut akerliliissuteqarsinnaanernum piffissaliussat assigiissaarneqassasut pingaartinneqarpoq. Tamatuma saniatigut maalaaruteqarsinnaanermum, akerliliissuteqarsinnaanermullu piffissaq killigititaq Ineqarneq pillugu Maalaaruteqartarfimmum maalaaruteqarsinnaanermum nalinginnaasumik killigititamum naapertuunnissaa pingaartinneqarpoq.

Nr. 4-mut.

Inissianik attartortittakkanik Namminersorlutik Oqartussanit kommuninillu pigineqartunik attartornissaq pillugu attartornissamut isumaqatigiissutinut tunngatillugu, attartortoq ineqarnermut akiliutip qaffanneqarnissaata ilimasaarutigineqarnerani piumasarisat

malinneqanginnerat pillugu Ineqarneq pillugu Maalaaruteqartarfimmut maalaaruteqarsinnaavoq.

Siunnersuutigineqarpoq, Namminersorlutik Oqartussat kommunilluunniit aalajangiisutut sunniuteqarfigisaani inissiatileqatigiiffik attartornermut akiliutip qaffanneqarnissaanik ilimasaarinerani, piumasarisaniq malinninnginnerup Ineqarneq pillugu Maalaaruteqartarfimmut maalaarutigineqarnissaanut taamaaqataanik periarfissamik atuutsitsisoqalissasoq.

Siunnersuutigineqarpoq, attartortup Ineqarneq pillugu Maalaaruteqartarfimmut maalaaruteqarnissaanut piffissamut killigititaq sapaatit akunnerinik 4-nik sivissuseqassasoq. Attartortoq Ineqarneq pillugu Maalaaruteqartarfimmut maalaaruteqarpat, siunnersuutigineqarpoq attartortitsisup eqqartuussivinnut suliakkiussinissaanut sapaatit akunnerini 6-ini piffissamut killigititaq, Ineqarneq pillugu Maalaaruteqartarfiup aalajangiinerata attartortitsisumut apuunneraniit piffissaq aallarnerfigalugu naatsorsorneqassasoq.

Ineqarneq pillugu Maalaaruteqartarfik naliliippat ilimasaarinnermut maleruagassat malinneqarsimangitsut, taamaattumillu attartornermut akiliutip qaffanneqarnissaanik ilimasaarineq atuuttussaangitsoq, suliaasaq inaarutaasumik aalajangiiffigineqartussanngorlugu eqqartuussivinnut suliakkiunneqassanersoq attartortitsisoq naliliisariaqarpoq. Taamaangippat attartortitsisup attartornermut akiliutip qaffanneqarnissaa ilimasaarutigineqartoq atorunnaarsinnaavaa aammalu nutaamik ilimasaarisinnaalluni.

Attartortitsisup attartornermut akiliut qaffanneqartussatut ilimasaarutigineqartoq, Ineqarneq pillugu Maalaaruteqartarfiup aalajangiinerata pinissaata tungaanut, attartornermut akiliutaagallartutut akilersissinnaavaa. Ilimasaarineq atortussaangitsoq Ineqarneq pillugu Maalaaruteqartarfik aalajangiippat, attartortitsisup suliaasaq eqqartuussivinnut suliakkiussinavaa. Eqqartuussiviup inaarutaasumik aalajangiinerata pinissaata tungaanut, attartortitsisup attartornermut akiliut qaffanneqartussatut ilimasaarutigineqartoq attartornermut akiliutaagallartutut suli akilersittaannarsinnaavaa. Suliakkiussinissamut piffissamut killigititaq naappat aammalu aalajangiineq eqqartuussivimmu qulliunerusumut suliakkiunneqarsimangippat, eqqartuussisut inaarutaasumik aalajangiinerat pisimassaaq.

Nr. 5-imut.

Sunniutaasumik allangortitsinissat arlallit, taamaalillunilu aalajangersagaq Ineqarneq pillugu Maalaaruteqartarfiup pilersinneqarneranut katitigaanerannullu tunngassuteqassasoq, siunnersuutigineqarput. Siunnersuummi Ineqarneq pillugu Maalaaruteqartarfiup inissiami attartortittakkami attortortup attartortitsisullu akornanni aaqqiagiinngissutinik suliaqarsinnaanermut piginnaaneqarfissai pingaarnerit aalajangersarneqarput. Siunnersuummi nr. 6-imi (§82a), nr. 7-imi (§ 84) aamma nr. 8-mi (§84a) attartornermut isumaqatigiissutit suut aamma aaqqiagiinngissutit suut Ineqarneq pillugu Maalaaruteqartarfimmut maalaarutigineqarsinnaanersut sukumiisumik maleruagassiuunneqarput.

Nr. 6-imut

Siunnersuutigineqarpoq attartornissamut isumaqatigiissutit paatsuugassaangitsumik nassuiarneqartut arlallit Ineqarneq pillugu Maalaaruteqartarfiup pisortatigoortumik aalajangiisinnaatitaaffiini pineqartunut ilaatinneqalissasut. Ineqarneq pillugu Maalaaruteqartarfiup najoqqutassatigut aalajangiisinnaatitaaffii siunnersuummi nr. 7-imi (§ 84) aamma nr. 8-mi (§ 84a) maleruagassiivigineqarput.

(§ 82a, nr. 1)

Nr. 1-imi pineqarput attartornissamut isumaqatigiissutit inissianik attartortittakkanik Namminersorlutik Oqartussanit imaluunniit kommunimit pigineqartunik attartortitsinermut tunngasut. Nr. 1-imi allannguuteqanngitsumik inissiat attartortittakkat, attartortitsinermut inatsimmi Namminersorlutik Oqartussat kommunillu inissiaataattut attartortittakkatut nassuiarneqartut, pineqartunut ilaatinneqarput.

(§ 82a, nr. 2)

Nr. 2-mi pineqarput attartornissamut isumaqatigiissutit inissianik attartortittakkanik Namminersorlutik Oqartussanit imaluunniit kommunimit pigineqartunik attartortitsinermut tunngasut aammalu tassani Namminersorlutik Oqartussat imaluunniit kommunip attartornissamut isumaqatigiissuteqareernerup kingorna inissiamik attartortittakkamik piginnittuuneq ingerlatsivimmut allamulluunniit, matumani Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik ilanngullugu, tunniunneqarsimasut. Tamatuma saniatigut siunnersuummi nr. 2 tassungalu nassuiaatit innersuussutigineqarput.

(§ 82a, nr. 3-4)

Nr. 3-4-mi pineqarpoq Namminersorlutik Oqartussat, kommunit imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik allamiit attartortuulluni, tamatumalu kingorna inissianik attartortittakkanik inissarsiortunut attartortitseqqissimatillugu, inissianik attartortittakkanik allamut attartortitseqqinneq. Inissarsiortut assersuutigalugu tassaasinnaapput sulisut sulisunut inissiamut pisinnaatitaaffeqartut imaluunniit inissarsiortut inissiamut utaqquisut allassimaffianniittut.

(§ 82a, nr. 5)

Nr. 5-imi pineqarpoq inissianik attartortittakkanik Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit pigineqartunik attartortitsineq. Inissiat attartortittakkat namminersortut inissiaataannut attartortittakkanut maleruagassani pineqartunut ilaatinneqarput aammalu maleruagassat atuuttut malillugit Ineqarneq pillugu Maalaaruteqartarfiup aalajangiisinnaatitaaffiini pineqartunut ilaatinneqaratik.

Siunnersuutigineqarpoq inissiat attartortittakkat Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit pigineqartut Ineqarneq pillugu Maalaaruteqartarfiup aalajangiisinnaatitaaffiini pineqartunut ilaatinneqalissasut. Taamaattoq taakkua siunnersuummi nr. 2-mi (§ 2, imm. 4) aamma siunnersuummi nr. 6-imi (§ 82a, nr. 2) pineqartunut ilaatinneqanngippata, inissiat attartortittakkat allannguuteqanngitsumik namminersortut inissiaataannik attartortittakkanik attartortitsinermut maleruagassani pineqartunut ilaatinneqassapput.

Nr. 7-imut

Siunnersuutigineqarpoq inissianik attartortittakkanik piginnittutut, inissianik attartortittakkanik allamut attartortitseqqinnertut imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik aqputigalugu attartortitseqqinnermi attartortitsineq pinersoq, apequtaatinnagu, takuuk siunnersuummi nr. 6 (§ 82a, nr. 1-4), attartortitsinermut inatsimmi § 84-imi Ineqarneq pillugu Maalaaruteqartarfiup inissiat attartortittakkat Namminersorlutik Oqartussat kommunillu nalinginnaasumik inissianik pilersuineranni ilaatinneqartut pillugit aalajangiinissamut piginnaatitaaffii maleruagassiivigineqassasut. § 84, imm. 2-5-imi suliaassanik suliarinninnermut maleruagassat maannakkut atuuttut aalajangersakkami nutaami immikkoortinneqassasut siunnersuutigineqarpoq, takuuk siunnersuummi nr. 8 (§ 84b).

Aalajangersakkap atuunnerani Ineqarneq pillugu Maalaaruteqartarfik suliaasaqarfiit § 84, nr. 1-7-imi allassimasut iluanni aalajangiisinnaavoq. Allattukkat tamakkiisuupput aammalu Ineqarneq pillugu Maalaaruteqartarfiup maalaarutit suliaasaqarfinnut allanut tunngassuteqartut itigartittussaassavai.

Suliaasaqarfiit ataasiakkaat § 84, nr. 1-7-imi allassimasut atuunnerat paasineqarnissaallu pillugit aalajangersakkat ataasiakkaat taakkunungalugu nassuiaatit innersuussutigineqarput.

Ineqarneq pillugu maalaaruteqartarfiup maalaarutininik suliaqarnermini pisassarisanik atuutsitsiniarsinnaatitaanermik ilatsiinnarneq pillugu pisassarisanik piumasaqartarneq pillugu inatsiseqarnermut malittarisassat nalinginnaasut kiisalu pisassarisat ilaasa pisoqalisoornerat pillugu inatsit nr. 274, 22. december 1908-meersoq naapertorlugu pisoqalisoorneq pillugu malittarisassat atuutsissallugit pisussaataavoq. Inatsit Kalaallit Nunaanni aningaasaatinut inatsisit il.il. atortuulersinneqarnera pillugu inatsit nr. 104, 31. marts 1965- imeersoq aqputigalugu pisoqalisoorneq pillugu inatsit Kalaallit Nunaannut atortuulersinneqarpoq. Attartortitsisup Ineqarneq pillugu Maalaaruteqartarfimmut oqaaseqarnermini ilatsiinnarneq imaluunniit pisoqalisoorneq atuuttussanngortissimaguniuk, Ineqarneq pillugu Maalaaruteqartarfik aalajangiinnermini tamanna isummerfigissavaa.

Taamaalilluni ilatsiinnarneq pisoqalisoornerluunniit patsisaalluni attartortup attartortitsisumut piumasaqarnini annaasinnaavaa. Ilatsiinnarneq pisoqalisoornerluunniit patsisaalluni attartortitsisup attartortumut piumasaqaatini assinganik annaasinnaavaa.

Nr. 8-mut

§ 84a-mut

Aalajangersagaq nutaajuvoq.

Siunnersuutigineqarpoq Ineqarneq pillugu Maalaaruteqartarfiup inissiat attartortittakkat Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit pigineqartut pillugit aalajangiinissamut piginnaatitaaffii attartortitsinermut inatsimmi § 84a-mi maleruagassiivigineqassasut. Aalajangersakkami assersuutigalugu ilaatinneqarput Illuutitut aktiaatileqatigiiffik Illuut A/S, Iserit A/S aamma Siorarsiorfik – Nuuk City Development A/S.

Aalajangersakkap atuunnerani Ineqarneq pillugu Maalaaruteqartarfik suliassaqarfiit § 84a nr. 1-6-imi allassimasut iluanni aalajangiisinnaavoq. Attartortitsinermut inatsimmi aalajangersakkat, namminersortut inissiaataannut attartortittakkanut aammalu Ineqarneq pillugu Maalaaruteqartarfimmut maalaarutigineqarsinnaasussanut tunngassuteqartut, innersuussutigineqarput. Allattukkat tamakkiisuupput aammalu Ineqarneq pillugu Maalaaruteqartarfiup maalaarutit suliassaqarfimmut allanut tunngassuteqartut itigartittussaassavai.

Suliassaqarfiit ataasiakkaat § 84a, nr. 1-6 -imi allassimasut atuunnerat paasineqarnissaallu pillugit aalajangersakkat ataasiakkaat taakkunungalu nassuiaatit innersuussutigineqarput.

Ineqarneq pillugu maalaaruteqartarfiup maalaarutininik suliaqarnermini pisassarisanik atuutsitsiniarsinnaatitaanermik ilatsiinnarneq pillugu pisassarisanik piumasaqartarneq pillugu inatsiseqarnermut malittarisassat nalinginnaasut kiisalu pisassarisat ilaasa pisoqalisoornerat pillugu inatsit nr. 274, 22. december 1908-meersoq naapertorlugu pisoqalisoorneq pillugu malittarisassat atuutsissallugit pisussaataavoq. Inatsit Kalaallit Nunaanni aningaasaatinut inatsisit il.il. atortuulersinneqarnera pillugu inatsit nr. 104, 31. marts 1965- imeersoq aqutugalugu pisoqalisoorneq pillugu inatsit Kalaallit Nunaannut atortuulersinneqarpoq. Attartortitsisup Ineqarneq pillugu Maalaaruteqartarfimmut oqaaseqarnermini ilatsiinnarneq imaluunniit pisoqalisoorneq atuuttussanngortissimaguniuk, Ineqarneq pillugu Maalaaruteqartarfik aalajangiinnermini tamanna isummerfigissavaa.

Taamaalilluni ilatsiinnarneq pisoqalisoorneerluunniit patsisaalluni attartortup attartortitsisumut piumasaqarnini annaasinnaavaa. Ilatsiinnarneq pisoqalisoorneerluunniit patsisaalluni attartortitsisup attartortumut piumasaqaatini assinganik annaasinnaavaa.

§ 84b-imut

Aalajangersagaq allannguuteqartinnagu attartortitsinermut inatsimmi § 84, imm. 2-4-mik ingerlatitseqqiineruvoq.

Imm. 1-imut

Suliassaq maalaaruteqartarfimmut suliakkiunneqartoq, maalaaruteqartup suut maalaaruteqartarfiup isummerfigisassaaturt kissaatiginerai allaganngorlugu saqqummiussinermik ilaqartinneqassaaq. Assersuutigalugu maalaaruteqartoq isumaqarsinnaavoq, inissiami maalaaruteqartup iserterfigisaani nateq lakkernerlunneqarsimasoq, natip lakkia sapaatit akunnerini sisamani nalinginnaasumik atorneqareerluni katagalersimammat. Aamma maalaarut ernissap kræfterluni nunami allami katsorsarneqarnissaanut atatillugu attartukkap allamut attartortinneqarnissaanut itigartitsinermut tunngasinnaavoq.

Imm. 2-mut

Allanguuteqartinnagu siunnersuutigineqarpoq maalaaruteqartoq maalaaruteqartarfimmut suliakkiussinermut annerpaamik 500 koruuninik akiliissasoq. Ineqarneq pillugu Maalaaruteqartarfik manna tikillugu 150 koruuninik akiliisitsisarpoq. Aningaasat taakku suliap suliarineqarnissaanut akiliutissatut eqqarsaatigineqanngillaq, kisiannili maalaarutit tunngavissaqanngilluinnartut maalaaruteqartarfimmut tunniunneqartarnissaanut pinngitsoortitsinissamik siunertaqarluni akiliutitut naammaginatutut atuutsinneqalersimalluni. Maalaaruteqartoq maalaaruteqarnermini tamakkiisumik ilaannaasumilluunniit taperserpeqarpat, akiliutigineqartut taakkua maalaaruteqartumut utertinneqassapput.

Imm. 3-mut

Maalaarut eqqartuussivinni suliarineqalereersimappat, Ineqarneq pillugu Maalaaruteqartarfiup maalaarut itigartissavaa. Taamaaliornermi isumalluutitigut mianerisassat pingaartinneqarput, taamatullu eqqartuussiviit suliani eqqartuussivinnut suliakkiunneqartunut inaarutaasumik aalajangiisussaataitanera pingaartinneqarluni.

Imm. 4-mut

Maalaarut suliassaqarfinnut Ineqarneq pillugu Maalaaruteqartarfiup aalajangiisinnaatitaaffiini pineqartunut ilaasunut tunngasoq allaffissornikkut oqartussamut allamut suliakkiunneqarsinnaanngilaq. Ineqarneq pillugu Maalaaruteqartarfiup aalajangiisinnaatitaanera allaffissornermut tunngatillugu kisimiilluni aalajangiisinnaatitaaffiuvoq.

Nr. 9-mut

Ineqarneq pillugu Maalaaruteqartarfik allaffissornikkut maalaaruteqartarfiuvoq. Tunngavissaatinneqarpoq eqqartuussivimmu assingusumik suliassanik piareersaasoqarsinnaanngitsoq imaluunniit piareersaasoqassanngitsoq. Ineqarneq pillugu Maalaaruteqartarfiup suliassamik suliarinninnera pingaarnerpaatigut allaganngorlugu ingerlanneqartarpoq. Suliassami pineqartunut ilaatinneqartut Ineqarneq pillugu Maalaaruteqartarfimmut oqaasiinnartigut nassuiaateqarnissamut periarfissaqanngillat.

Tamanna tunngavigalugu siunnersuutigineqarpoq, suliassami isumannaatsumik paasissutissiinissamut aalajangiinissamullu eqqartuussivinnut assingusumik, takusaanertut naliliinertullu imaluunniit suliami pineqartut takunnittullu nassuiaanerattut ittumik, suliassamik piareersaanissaq pisariaqarpat, Ineqarneq pillugu Maalaaruteqartarfiup maalaarut itigartissagaa, erseqqissarneqassasoq.

Nr. 10-mut

Attartortitsineq inissianik attartortittakkanik piginnittut, inissianik attartortittakkanik allamut attartortitseqqinnertut imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik aqputigalugu allamut attartortitseqqinnertut pinersaq apeqqutaatinnagu, Ineqarneq pillugu Maalaaruteqartarfiup aalajangiinera inissiat attartortittakkat, Namminersorlutik Oqartussat kommunillu nalinginnaasumik inissianik pilersuineranni ilaatinneqartut, pillugit attartornissamut isumaqatigiissummut pisussaaffiliisumik atuuttussaasoq, erseqqissarneqassasoq siunnersuutigineqarpoq.

Attartortitsineq inissianik attartortittakkanik piginnittut, inissianik attartortittakkanik allamut attartortitseqqinnertut imaluunniit Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffik aqputigalugu allamut attartortitseqqinnertut pinersaq apeqqutaatinnagu, Maalaaruteqartarfiup aalajangiineri Namminersorlutik Oqartussanut kommuninullu pisussaaffiliisumik atuutissapput. Inissiaatileqatigiiffik allami inissianik attartorpat aammalu inissiat inissarsiortunut attartorteqqillugit, Ineqarneq pillugu Maalaaruteqartarfiup aalajangiinera aammattaq Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmut pisussaaffiliisumik atuutissaaq.

Aalajangiinerup pisussaaffiliisumik atuuttussaanerata malitsigisaanik attartortitsisoq aalajangiinerup malinnissaanut pisussaaffeqarpoq. Kisiannili maalaaruteqartarfiup aalajangiineri pinngitsaaliisuunngillat, tassa imaappoq aalajangiinerit pinngitsaaliissumik atuutinneqarsinnaanngillat. Tamatuma atuunnerani, attartortitsisup aalajangiineq malinngippagu, pinngitsaaliissummik atuutitsinissamut tunngavissaqalerniarluni inaarutaasumik maalaaruteqartarfiup aalajangiineri eqqartuussivinnut suliakkiunneqassapput.

Ineqarneq pillugu Maalaaruteqartarfiup aalajangiineri allaffissornikkut oqartussamut allamut suliakkiunneqarsinnaanngillat, tassa imaappoq maalaaruteqartup Ineqarneq pillugu Maalaaruteqartarfiup aalajangiinera naammaginngikkuniuk aammalu iliuseqarfigerusukkuniuk, maalaaruteqartoq eqqartuussivinnut nalinginnaasunut saaffiginnittariaqarpoq.

Oqaatigineqassaaq eqqartuussiviit suliaqarnermi allaffissornikkut aalajangiinernik inatsisi malillugit inaarutaasunik misiliinissanut sunulluunniit mattunneqarsimasutut imminnut isiginngimmata, kisianni inaarutaasumik aalajangersakkat misiliinerup annertussusaanut sunniisarlutik.

Siunnersuutigineqarpoq Ineqarnej pillugu Maalaaruteqartarfiup aalajangiineri inissiat attartortittakkat Namminersorlutik Oqartussat kommunilluunniit aalajangiisutut sunnuteqarfigisaani inissiaatileqatigiiffimmit pigineqartut pillugit isumaqatigiissutinut pisussaaffiliisumik atuuttussaassanngitsut. Inissiaatileqatigiiffiup maalaaruteqartarfiup aalajangiinera malinngippagu, attartortoq eqqartuussivinnut suliaakkiisariaqarpoq. Ilaatitsinnginnermi assersuutigalugu pineqartunut ilaapput Illuutitut aktiaatileqatigiiffik Illuut A/S, Iserit A/S aamma Siorarsiorfik – Nuuk City Development A/S. Taamaaliordermi ingerlatseqatigiiffiit amerlanertigut avataaniit taarsigassarsinikkut inissianik aningaasalersuisarnerat, taamaattumillu eqqartuussiviit inaarutaasumik tamakkiisumillu inissianik attartortittakkanik attartortitsinnermut tunngavigisat misiliiviginissaanik pisariaqartitsisinaanerat, tamatumani pingaartinneqarpoq.

§ 2-mut

Imm. 1-imut

Siunnersuutigineqarpoq allannguutissatut inatsit ulloq 1. januar 2023 atuutilissasoq.

Naliliisoqarpoq attartortitsisut taamaaliordermi attartornermut isumaqatigiissutini pioreersuni allannguuteqartitsisinaanissamut pisariaqartumik piffissaqassasut. Attartornermut akiliutit appartinneqarnerat ilimasaarinertaqanngitsumik pisinnaavoq. Attartornermut akiliutinik qaffaaneq inatsisini pisussaaffiusumik ilimasaarisarnej atorlugu ilimasaarutigineqartariaqarpoq.

Siunnersuutigineqarpoq allannguutit attartornissamut isumaqatigiissutinut pioreersunut, siunissamilu isumaqatigiissutissanut attartortitsinnermut inatsimmi pineqartunut ilaasunut atuutissasut. Ineqarnej pillugu Maalaaruteqartarfiup piginnaasaanut tunngasut, 2023-milu januaarip aallaqqaataa sioqqullugu pisimasut maalaarutigineqarsinnaapput.

Taamaattoq attartornermi isumaqatigiissutinut atorunnaareersunut allannguutit atuutinngillat, taamaattoq imm. 2 takuuk. Taamaalilluni attartornermut isumaqatigiissutinut atorunnaareersunut tunngatillugu uppersarsaatitut tunngatillugu ajornartorsiutaasinnaasut pingaartinneqarput. Tamatuma saniatigut Ineqarnej pillugu Maalaaruteqartarfiup nukissaqassusaata attartornermut isumaqatigiissutinut piusunut atorneqarnissaa pingaartinneqarpoq.

Imm. 2-mut

§ 82a-mi nr. 3-5 naapertorlugit attartortumut najugaqarfissatut attartortitsineq pillugu isumaqatigiissut, malittarisassat nalinginnaasut naapertorlugit Ineqarnej pillugu Maalaaruteqartarfimmut maalaarutigineqarsinnaavoq.

Maalaaruteqarsinnaanermut piffissaliussaq, inatsisartut inatsisaata matumap atuutilerneratigut atuutilissaaq. Taamaangippat allannguutissatut siunnersuutip atuutilerera sioqqullugu pissutsit pillugit attartortut maalaaruteqarsinnaassanngillat.

Imm. 3-mut

Attartornermut isumaqatigiissutip atsiorterata kingorna inissiaq pisortanit ingerlatseqatigiiffimmut allamulluunniit tunniunneqarsimatillugu, inissiani attartortittakkani attartortunit maalaarutit Ineqarneq pillugu Maalaaruteqartarfiup itigartitsisutigisarpai.

Attartortitsisup inissiami attartortittakkat ingerlatseqatigiiffimmut allamulluunniit tunniussisimaneratigut, attartornermi isumaqatigiissut kiisalu attartornermut inatsit naapertorlugu attartoreersut pisinnaatitaaffiarsinnaanngikkai nalilerneqarpoq. Tamanna pisassarisanik piunnaqartarneq pillugu inatsiseqarnermi malittarisassani nalinginnaasuni, isumaqatigiissusiortarnermilu inatsiseqarnermi malittarisassani atuuppoq, siunnersuutillu § 2-ani, imm. 4-ni kiisalu § 82 a-ni, nr. 2-mi isumalluarnartumik malittarisassiuunneqarluni.

Attartornermut isumaqatigiissusioreernerup kingorna Namminersorlutik Oqartussat kommunilluunniit attartortittagaataa ingerlatseqatigiiffimmut allamulluunniit tunniunneqarsimaneratigut Ineqarneq pillugu Maalaaruteqartarfik maalaarummik itigartitsisimaguni, attartortup piunnaqarneratigut Ineqarneq pillugu Maalaaruteqartarfiup maalaarummik qaqitseqqinnissaanik pisussaaffilerneqassasoq siunnersuutigineqarpoq. Suliap itigartitsisutigineqarsimasup qaqinneqaqqinnissaanik piunnaqaat, Inatsisartut inatsisaata atuutilerneranit kingusinnerpaamik sapaatip akunneri arfinillit qaangiuppata tunniunneqarsimassaaq. Kingusinnerusukkut piunnaqaatigineqartut itigartinneqassapput.

Ilanngussaq 1 - nallersuusssineq

| Siunnersuut inatsisinut atuuttunut sanilliullugu | |
|---|---|
| <i>Oqaasertai atuuttut</i> | <i>Allannguutissatut siunnersuut</i> |
| | <p>1. § 1 kingorna ilanngunneqarpoq: ” § 1a. Namminersorlutik Oqartussat kommunillu inissiaatai attartortittakkat pillugit kapitali 3-7-imi, aamma 9-11-mi aalajangersakkat, pisariaqartumik naleqqussarlugit, taamaaqataanik makkununga atuupput:</p> <p>1) Inissianik attartortittakkanik Namminersorlutik Oqartussanit imaluunniit kommuninit attartorneqartunik, tamatumalu kingorna attartortumut attartorteqqinneqartunik, attartortumut inissiatut attortortitsinissaq pillugu isumaqatigiissut.</p> <p>2) Inissianik attartortittakkanik Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmi attartorneqartunik, tamatumalu kingorna attartortumut attartorteqqinneqartunik, attartortumut inissiatut attartortitsinissaq pillugu isumaqatigiissut.</p> <p><i>Imm. 2.</i> Imm 1 malillugu inissiat attartortittakkat naatsorsuusioriaatsimi immikkoortutut nammineertutut ataatsitut najugaqatigiiffimmi ataatsimi attartortitsisumit ataatsimoortinneqarsinnaapput, takuuk kapitali 3-4.</p> <p><i>Imm. 3.</i> Najugaqartut oqartussaaqatigiinnerat, attartornermut akiliummik aalajangersaasarneq, attartornermut akiliutip iluarsineqartarnera allaffissornerlu, attartornermi akiliutit, attartukkap aserfallatsaalineqarnera, iluarsartuunneqarnera atorneqarneralu, atuisinnaatitaanerup allanut tunniunneqartarnera pillugit kiisalu inissianut</p> |

| | |
|--|---|
| | <p>attartortittakkanut imm. 1-imi pineqartunut ilaasunut atuuttumik isumaqatigiissutip atorunnaarsinneqartarnera atorunnaarsitsisarnerlu pillugit maleruagassanik Naalakkersuisut aalajangersaasinnaapput. Erseqqinnerusumik aalajangikkamik annertussusilimmik inissiat attartortittakkat imm. 1-imi pineqartunut ilaasut kapitali 3-7-imi aamma 9-11-imi aalajangersakkani ilaatinneqanngitsut, maleruagassanik Naalakkersuisut ilanngullugu aalajangersaasinnaapput.”</p> |
| | <p>2. § 2-mi imm. 4-tut nutaatut ilanngunneqarpoq: ” <i>Imm. 4.</i> Illumik imaluunniit illumi ineeqqamik najugaqarfissatut attartortinneqartumik pigisassatut imaluunniit attartugassatut tunniussinermi, takuuk § 1, inatsisartut peqqussutaat manna attartornermilu isumaqatigiissut naapertorlugit attartortumut pisinnaatitaaffinnik pisussaaffinnillu atuuttunik tamaginnik pissarsisoq tigusissaaq.”</p> |
| | <p>3. § 34, imm. 1-ip immikkoortua siulleq imatut oqaasertalerneqassaaq: ”Attartortup attartornermut akiliutip qaffannissaa, tak. § 33. imm. 5, pillugu piumasaqaat akueriumanngikkuniuk, attartortoq piumasaqaatip tигuneraniit kingusinnerpaamik sapaatit akunnerisa sisamat qaangiunnerini attartortitsisumut allakkatigut akerliliissummik saqqummiussissaaq, tassanilu piumasaqaammi immikkoortut suut akuerineqarsinnaannginersut allanneqassaaq.”</p> |
| | <p>4. § 34-mi una imm. 4-tut</p> |

§ 34. Attartortup ineqarnermut akiliutip qaffanneqarnissaanik piumasaqaat akueriumanngikkuniuk, tak. § 33, imm. 5, attartortup piumasaqaatip tiguneraniit kingusinnerpaamik sapaatit akunnerisa marluk qaangiunnerini akerliliissut allaganngorlugu attartortitsisumut saqqummiutissavaa, tassanilu piumasaqaammi immikkut suut akueriumaneqannginersut allanneqassapput. Taamatut pisoqarpat attartortitsisup ineqarnermut akiliummik qaffaanissaminik piumasaqarnini aalajangiisimaannaruniuk suliaq sapaatit akunneri arfinillit qaangiutinnagit eqqartuussivinnut suliakkiissutigissavaa.

Imm. 2. Suliaq eqqartuussivinnut suliakkiissutigineqarpat, attartortitsisup ineqarnermut akiliutissatut siumoortumik nalunaarutigalugu piumasaqaatigineqartoq akilersortissavaa ineqarnermut akiliutaagallartutut eqqartuussiviup aalajangiinissaata tungaanut. Tamatuma kingorna ineqarnermut akiliut eqqartuussiviup aalajangiinera naapertorlugu iluarsiivigineqassaaq. Ineqarnermut akiliummik akiliisitsivallaartoqarsimappat, eqqartuussiviup aalajangerneraniit kingusinnerpaamik qaammatit pingasut qaangiunnerini attartortitsisup ineqarnermut akiliut iluarsiivigissavaa, piffissamit ineqarnermut akiliisitsivallaarfiusup aallartinneraniit atuuttussatut naatsorsorlugu.

Imm. 3. Attartortitsisup ineqarnermut akiliisitsivallaarutitik iluarsiiinera eqqartuussiviup aalajangiineraniit qaammatit pingasut sinnerlugit kingusinneruppat, attartortup ineqarnermut akiliivallaarutit ernialernejarnissaat piumasarisinnaavaa, piffissamit ineqarnermut akiliisitsivallaarfiusup aallartinneraniit atuuttussatut naatsorsorlugu. Kingusinaarluni akiliinermi il.il. ernialersuisarnej pillugu inatsimmi maleruagassat naapertorlugit

ilanngunneqassaaq:

” *Imm. 4.* § 33, imm. 5, oqaaseqatigiit aappaat pingajuilu naapertorlugit attartornermut akiliutip qaffanneqarnissaanik ilimasaarinissamut maleruagassanik attartortitsisup malinninnginnera, kingusinnerpaamik piumasaqaatip tiguneqareerneranit sapaatit akunnerit sisamat qaangiunneranni, inissiamik attartortittakkamik, Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmi, attartortup Ineqarnej pillugu maalaaruteqartarfimmut maalaarutigisinnavaa. Ineqarnej pillugu Maalaaruteqartarfiup aalajangiinissaata tungaanut attartortitsisup attartornermut akiliut ilimasaarutigineqartoq ineqarnermut akiliutaagallartutut akilersittarsinnaavaa. *Imm. 2-3* taamaaqataanik atuutissapput. Ineqarnej pillugu maalaaruteqartarfimmut maalaaruteqartoqarnerani, Ineqarnej pillugu Maalaaruteqartarfiup aalajangiinerata attartortitsisumut apuunnissaata tungaanut eqqartuussivinnut suliakkiussinissamut attartortitsisup piffissamut killigititaa atorunnaarsinneqassaaq.”

| | |
|--|---|
| <p>erniat naatsorsorneqassapput.</p> | |
| <p>§ 82. Namminersorerullutik Oqartussat kommunellu inissiaataanni attartortittakkani attartortut attartortitsisullu akornanni aaqqiagiinngissutit, tak. § 84, suliarineqarnissaannut Naalakkersuisut ineqarneq pillugu maalaaruteqartarfimmik pilersitsisinnaapput, taannalu siulittaasoqassaaq maalaaruteqartarfimmilu pingasunik nalinginnaasunik ilaasortaqaassalluni.</p> <p><i>Imm. 2.</i> Siulittaasoq taassumalu sinniisissaa Naalakkersuisup ineqarneq pillugu suliaaqqarfimmu akisussaasuusup innersuussuteqarneratigut Naalakkersuisunit toqqarneqassapput, taakkulu marluullutik ineqarnermi pissutsinut immikkut ilisimasaqassapput imaluunniit inatsilerituutut soraarummeersimassallutik. Maalaaruteqartarfimmu ilaasortaqa ataaseq taassumalu sinniisissaa A/S Inissiaatileqatigiiffik INI-p innersuussuteqarneratigut Naalakkersuisunit toqqarneqassapput. Maalaaruteqartarfimmu ilaasortaqa ataaseq taassumalu sinniisissaa KANUKOKA-p inassuteqarneratigut Naalakkersuisunit toqqarneqassapput, aammalu maalaaruteqartarfimmu ilaasortaqa ataaseq taassumalu sinniisissaa Ineqartut Peqatigiiffiisa Kattuffiata IPK-p inassuteqarneratigut Naalakkersuisunit toqqarneqassallutik, taamaattorli tak. imm. 6. Maalaaruteqartarfimmu ilaasortat pingasut nalinginnaasut taakkulu sinniisissaat ineqarneq pillugu sulianut tunngasunik ilisimasaqassapput.</p> | <p>5. § 82, imm. 1 aamma 2 imatut oqaasertalerneqarput:</p> <p>”§ 82. Inissiani attartortittakkani attartortup attartortitsisullu akornanni aaqqiagiinngissutaasut suliarineqarnissaannut Naalakkersuisut ineqarneq pillugu maalaaruteqartarfimmik, siulittaasoqartumik pingasunillu ilaasortaqaartumik, pilersitsisinnaapput.</p> <p><i>Imm. 2.</i> Siulittaasoq taassumalu sinniisissaa Naalakkersuisunit toqqarneqassapput. Siulittaasoq, taassumalu sinniisissaa inatsilerituutut soraarummeersimassapput, ineqarnermullu tunngasunik immikkut ilisimasaqassallutik. Maalaaruteqartarfimmu ilaasortaqa ataaseq taassumalu sinniisissaa INI A/S -p innersuussuteqarneratigut Naalakkersuisunit toqqarneqassapput. Maalaaruteqartarfimmu ilaasortaqa ataaseq taassumalu sinniisissaa kommunit peqatigiillutik inassuteqarnerisigut Naalakkersuisunit toqqarneqassapput, aammalu maalaaruteqartarfimmu ilaasortaqa ataaseq taassumalu sinniisissaa Ineqartut Peqatigiiffiisa Kattuffiata IPK-p inassuteqarneratigut Naalakkersuisunit toqqarneqassallutik, taamaattorli takuuk imm. 6. Maalaaruteqartarfimmu ilaasortat pingasut nalinginnaasut taakkulu sinniisissaat ineqarneq pillugu sulianut tunngasunik ilisimasaqassapput.”</p> |
| | <p>6. § 82 kingorna ilanngunneqarpoq:</p> <p>” § 82a. Ineqarneq pillugu Maalaaruteqartarfiup aaqqiagiinngissutit attartornissamut isumaqatigiissutit</p> |

| | |
|--|---|
| | <p>makkunangga pisut suliarisinnaavai:</p> <p>1) Inissianik attartortittakkanik Namminersorlutik Oqartussanit imaluunniit kommunimit pigineqartunik attartortumut najugaqarfissatut attartortitsinissaq pillugu isumaqatigiissut.</p> <p>2) Attartortitsinissamut isumaqatigiissuteqareernerup kingorna inissiaq attartortittagaq allamut tunniunneqarsimappat, inissianik attartortittakkanik isumaqatigiissuteqarnerup nalaani Namminersorlutik Oqartussanit imaluunniit kommunimit pigineqartunik attartortumut najugaqarfissatut attartortitsinissaq pillugu isumaqatigiissut.</p> <p>3) Inissiat attartortittakkanik, Namminersorlutik Oqartussanit imaluunniit kommunimit attartorneqartunik, tamatumalu kingorna attartortumut attartorteqqinneqartunik, attartortumut najugaqarfissatut attartortitsineq pillugu isumaqatigiissut.</p> <p>4) Inissianik attartortittakkanik, Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit attartorneqartunik, tamatumalu kingorna attartortumut attartorteqqinneqartumik, attartortumut najugaqarfissatut attartortitsinissaq pillugu isumaqatigiissut.</p> <p>5) Inissianik attartortittakkanik Namminersorlutik Oqartussat kommunilluunniit aalajangiisutut sunniuteqarfigisaani inissiaatileqatigiiffimmit, pigineqartunik attartortumut najugaqarfissatut attartortitsinissaq pillugu isumaqatigiissut.”</p> |
| <p>§ 84. Ineqarneq pillugu Maalaaruteqartarfiup attartortut maalaarutaat makkununnga tunngasut suliarisarpai:</p> <p>1) Ineqarnermut akiliutinik qaffaanissamik</p> | <p>7. § 84 imatut oqaasertalerneqarpoq:</p> <p>” § 84. Ineqarneq pillugu Maalaaruteqartarfiup maalaarutit makkununnga tunngasut attartortunit suliakkiissutigineqartut suliarisarpai, takuuk</p> |

| | |
|---|--|
| <p>siumoortumik ilisimatitsisarnermi piumasarisat, tak. § 28, imm. 2.</p> <p>2) Aserfallatsaaliuineq iluarsaassinerlu, tak. § 45.</p> <p>3) Inissiap iserterfigineqarnerani qanoq issusia, tak. § 47.</p> <p>4) Attartukkami atortut ikkussukkat pitsannorsaanerillu (atuisinnaatitaaneq), tak. §§ 51 aamma 55.</p> <p>5) Attartortup attartukkaminik atuinera (torersaarnissamik malittarisassanik unioqqutitsinerit), tak. § 50.</p> <p>6) Atuisinnaatitaanerup allanut tunniunneqarnera (inissianik paalaateqatigiinneq, attartukkamik allanut utaqqiisaasumik attartortitsigallarneq aamma attartornermik nangitsineq), tak. §§ 58-62.</p> <p>7) Inissiamit aninermi inissiap qanoq issusia (iluarsaassineq nalinginnaasoq), tak. § 77.</p> <p><i>Imm. 2.</i> Maalaarutit ineqarneq pillugu maalaaruteqartarfimmut allaganngorlugit tunniunneqartassapput, aammalu maalaaruteqartup Maalaaruteqartarfiup sumik isummerfigisaqarnissaanut kissaataanik erseqqissaassummik imaqaassalluni. Maalaarummut pissutsinut attartortup suliaritikkusutaanut uppersaatissat pisariaqartinneqartut ilaatinneqassapput.</p> <p><i>Imm. 3.</i> Maalaarutip ineqarneq pillugu maalaaruteqartarfimmi suliarineqarnissaanut attartortoq annerpaamik 500 kr.-inik sullissinermut akiliummik akiliuteqartinneqassaaq. Maalaaruteqartoq maalaarutigineqartoq pillugu taperserreqarpat imaluunniit suliaq ineqarnermut maalaaruteqartarfimmi suliarineqarnissaminut naleqqutinngitsutut itigartinneqarpat aningaasat sullissinermut akiliutigineqartut maalaaruteqartumut utertinneqassapput.</p> <p><i>Imm. 4.</i> Attartortup suliaq eqqartuussivinnut suliakkiissutigineqareersoq ineqarneq pillugu maalaaruteqartarfimmut</p> | <p>§ 82a, nr. 1-4:</p> <p>1) Ineqarnermut akiliutinik qaffaanissamik siumoortumik ilisimatitsisarnermi piumasarisat, jf. § 28, imm. 2.</p> <p>2) Aserfallatsaaliuineq iluarsaassinerlu, takuuk § 45.</p> <p>3) Inissiap iserterfigineqarnerani qanoq issusia, takuuk § 47.</p> <p>4) Attartukkami atortut ikkussukkat pitsannorsaanerillu (atuisinnaatitaaneq), takuuk §§ 51 aamma 55.</p> <p>5) Attartortup attartukkaminik atuinera (torersaarnissamik malittarisassanik unioqqutitsinerit), takuuk § 50.</p> <p>6) Atuisinnaatitaanerup allanut tunniunneqarnera (inissianik paarlaateqatigiinneq, attartukkamik allanut attartortitsineq aamma attartornermik nangitsineq), takuuk §§ 58-62.</p> <p>7) Inissiamit aninermi inissiap qanoq issusia (iluarsaassineq nalinginnaasoq), takuuk § 77.”</p> |
|---|--|

| | |
|---|---|
| <p>suliakkiissutigineqarnissaa kissaatigippagu, maalaaruteqartarfik maalaarutip suliarinissaanut itigartitsissaaq.</p> <p><i>Imm. 5.</i> Pissutsit imm. 1-imi taaneqartut pillugit maalaarutit Ineqarneq pillugu Maalaaruteqartarfiup saniatigut allaffissornikkut oqartussaasunut allanut saqqummiunneqarsinnaanngillat.</p> | |
| | <p>8. § 84 kingorna ilanngunneqarpoq: ” § 84a. Ineqarneq pillugu Maalaaruteqartarfiup maalaarutit makkununga tunngasut attartortunit suliakkiissutigineqartut suliarisarpai, takuuk § 82a, nr. 5:</p> <ol style="list-style-type: none"> 1) Ineqarnermut akiliutinik qaffaanissamik siumoortumik ilisimatitsisarnermi piumasarisat, takuuk § 33, imm. 5. 2) Aserfallatsaaliuineq iluarsaassinerlu, takuuk § 46. 3) Inissiap iserterfigineqarnerani qanoq issusia, takuuk § 47. 4) Attartortup attartukkaminik atuinera (torersaarnissamik malittarisassanik unioqqutitsinerit), takuuk § 50. 5) Atuisinnaatitaanerup allanut tunniunneqarnera (attartukkamik allamut attartortitsineq aamma attartornermik nangitsineq), takuuk § 58, imm. 1-3, §§ 60-62. 6) Inissiamit aninermi inissiap qanoq issusia (iluarsaassineq nalinginnaasoq), takuuk § 77. <p>§ 84b. Maalaarutit Ineqarneq pillugu maalaaruteqartarfimmut allaganngorlugit tunniunneqartassapput, aammalu maalaaruteqartup Maalaaruteqartarfiup sumik isummerfigisaqarnissaanut kissaataanik erseqqissaassummik imaqaqalluni. Attartorneq pillugu maalaarummik attartortitsisup suliamik naammassinninneranit kingusinnerpaamik sapaatip akunneri sisamat qaangiunnerini</p> |

| | |
|--|---|
| | <p>maalaarut Ineqarneq pillugu Maalaaruteqartarfimmut ingerlateqqinneqassaaq. Pissutsinut attartortup suliaritikkusutaanut uppersaatissatit pisariaqartut maalaarummut ilanngunneqassapput.</p> <p><i>Imm. 2.</i> Maalaarutip Ineqarneq pillugu maalaaruteqartarfimmi suliarineqarnissaanut attartortoq annerpaamik 500 koruuninik sullissinermut akiliummik akiliissaaq. Maalaarutigineqartoq pillugu attartortoq taparserneqarpat imaluunniit suliaq Ineqarneq pillugu maalaaruteqartarfimmi suliarineqarnissaminut naleqqutinngitsutut itigartinneqarpat, maalaaruteqarnermut akiliut utertillugu akilerneqassaaq.</p> <p><i>Imm. 3.</i> Attartortup suliaq eqqartuussivinnut suliakkiissutigineqareersoq Ineqarneq pillugu maalaaruteqartarfimmut suliakkiissutigineqarnissaa kissaatigippagu, Maalaaruteqartarfiup maalaarutip pissusiviusuni suliarinissaa itigartissavaa.</p> <p><i>Imm. 4.</i> Pissutsit imm. 1-imi taaneqartut pillugit maalaarutit Ineqarneq pillugu allaffissornikkut oqartussamut allamut suliakkiunneqarsinnaanngillat.”</p> |
| <p>§ 85. Ineqarneq pillugu Maalaaruteqartarfiup maalaarut, maalaaruteqartarfimmi suliarineqarnissamut naleqqutinngitsutut nalilerneqartoq suliarinissaa itigartissavaa.</p> <p><i>Imm. 2-8.</i> ...</p> | <p>9. § 85, imm. 1 imatut oqaasertalerneqarpoq: ” Ineqarneq pillugu Maalaaruteqartarfiup maalaarutip, maalaaruteqarsinnaanermut piffissarititaq qaangiutereersoq maalaarutigineqartoq imaluunniit maalaaruteqartarfimmi suliarineqarnissamut naleqqutinngitsutut nalilerneqartup, suliarinissaa itigartissavaa. Maalaarutit, suliap isumannaatsumik paasissutissiiviginissaanut suliamut ilisimasalimmit misissorneqarnissaa naliliivigineqarnissaalu imaluunniit suliamut attuumassuteqartut takunnittullu nassuiaanissaat pisariaqarsimappata, Ineqarneq pillugu Maalaaruteqartarfiup itigartissavai.”</p> |

| | |
|---|---|
| <p><i>Imm. 6.</i> Ineqarneq pillugu Maalaaruteqartarfiup aalajangiineri Namminersornerullutik Oqartussanut kommunenullu, inissianik attartortitsisuusunut pinngitsoorani malinneqassapput. Namminersornerullutik Oqartussat kommuneluunniit avataaniit allaffissornikkut aqutsisumik isumaginnittuutitaqarpata, maalaruteqartarfiup aalajangiineri aamma taakkununga pinngitsoorani malinneqassapput.</p> | <p>10. § 86, imm. 6 imatut oqaasertalerneqarpoq: ” <i>Imm. 6.</i> Ineqarneq pillugu Maalaaruteqartarfiup aalajangiineri § 82a, nr. 1-4-imi pineqartunut ilaasunik attartortitsineq pillugu isumaqatigiissut naapertorlugu attartortitsisumut pisussaaffiliisumik atuutissapput. Attartortitsisoq avataaneersumik allaffissornikkut aqutsisussamik suliaqartitsippat, Maalaaruteqartarfiup aalajangiineri taamatuttaaq tassunga pisussaaffiliisumik atuutissapput.”</p> |
| | <p style="text-align: center;">§ 2</p> <p>Inatsisartut inatsisaat manna ulloq 1. januar 2023 atuutilerpoq, attartortumullu najugaqarfissatut attartortitsinissaq pillugu attartornermi isumaqatigiissutitut atuuttunut, siunissamilu isumaqatigiissutineqartussanut atuulluni, taamaattorli takuuk imm. 2 aamma 3.</p> <p><i>Imm. 2.</i> Inatsisartut inatsisaanni matumani § 1-imi nr. 6-imi oqaasertalerneqartutut, § 82 a-mi nr. 3-5 naapertorlugit attartortumut najugaqarfissatut attartortitsineq pillugu isumaqatigiissut, malittarisassat nalinginnaasut naapertorlugit Ineqarneq pillugu Maalaaruteqartarfimmut maalaarutigineqassaaq. 2023-mi januaarip aallaqqaataa sioqqullugu pissutsit pillugit maalaarut, inatsisartut inatsisaata matumap atuutilerneranit kingusinnerpaamik sapaatip akunneri sisamat qaangiuppata Ineqarneq pillugu Maalaaruteqartarfimmut maalaarutigineqassaaq.</p> <p><i>Imm. 3.</i> Inatsisartut inatsisaanni matumani § 1-imi nr. 6-imi oqaasertalerneqartutut, § 82 a-mi nr. 2 naapertorlugu attartortumut najugaqarfissatut attartortitsineq pillugu isumaqatigiissut pillugu maalaarut, inissiaq</p> |

| | |
|--|---|
| | <p>Namminersorlutik Oqartussanit kommunimilluunniit pigineqannginnera innersuussutigalugu Ineqarneq pillugu Maalaaruteqartarfiup maalaarut itigartitsissutigisimappagu, maalaarutip qaqqinneqaqqinnissaanik maalaaruteqartoq piumasqaarsinnaavoq. Maalaarutip qaqqinneqaqqinnissaanik piumasqaat, Inatsisartut inatsisaata matumap atuutilerneranit kingusinnerpaamik sapaatip akunneri arfinillit qaangiunnerini Ineqarneq pillugu Maalaaruteqartarfimmut allaganngorlugu tunniunneqassaaq. Kingusi-naarluni piumasqaartoqartillugu, Ineqarneq pillugu Maalaaruteqartarfiup piumasqaat itigartissavaa.</p> |
|--|---|